

四明叢書
張宗祥



聚齋家塾書鈔原序

甫自幼洎長侍先君子側平旦集諸生及諸子危坐說書夜再講率至二鼓無倦容謂學問大旨在明本心吾之本心卽古聖之心卽天地之心卽天下萬世之心彼昏不知如醉如夢一日豁然清明洞徹聖人卽我我卽聖人舜號泣旻天負罪引慝祇見瞽瞍禹荒度土功三過家門呱呱弗子道心精一曾何閒斷自古大聖同此一心箕子論皇極無偏黨自蕩蕩無黨偏自平平無反側自正直是之謂極是之謂本心太甲顛覆典刑痛自

怨艾克終允德成王遭家多難執書感泣天雨反風本
心一昏迷惑如彼本心一復光明如此先君子諷誦再
三聞者流涕又言見象山先生讀康誥有所感悟反已
切責若無所容讀呂刑歎曰從肺腑中流出鳴虔至哉
先君子之學源自象山明白光粹無一瑕疵可謂不失
本心矣是編爲伯兄手鈔雖非全書然發揮本心大旨
具在伯兄名喬天資純正用志勤篤嘗宰溧陽視民猶
子邑人德之惜未盡行所學爾甫悼先君子之沒幸伯
兄之有傳今又云亡痛曷有已遂刻是編名曰絜齋家

塾書鈔而納諸象山書院以與世世學者共之紹定四
年辛卯良月己未男甫謹書

序

清修四庫宗朱而抑陸凡治陸學者目爲金谿一派而歧視之獨絜齋家塾書鈔則稱其發明本心反覆引伸能暢其師說而於帝王治迹尤參酌古今一一標舉其要領更引王深寧困學紀聞採錄解儆戒無虞諸條以爲其理至足雖異趣者亦不能易也夫深寧兼治朱呂陸之學和齊斟酌不名一師固不得謂之異趣然斯鈔湮沒久獨從永樂大典採輯編次俾復舊觀以傳於今未始不可爲先生幸矣考蒙齋原序云是編爲伯兄手

鈔雖非全書然發揮本心大旨具在伯兄者喬也喬字
崇謙嘗爲溧陽令云宋史藝文志作十卷今爲十二卷
至君奭篇止其閒如五子之歌胤征湯誓仲虺之誥皆
闕且有一篇之中闕其註解者壽鏞讀之以爲雖非完
書而包舉經史由淺入深自修己用人以至恐懼修省
敬天愛民立綱陳紀一言一動惟求合乎人心者不可
枚舉如曰古之巡守爲民也後世之巡守悅己也又曰
後世以爲緩而不切者古人視之爲甚急其論設官也
曰宰相不可不明天下事而亦非一人所能自爲吾心

既曉然於天下之事又得僚屬相與協力豈不足以宅
百揆豈不足熙帝之載乎其說金縢也曰人主一念慮
之閒而其報應有反掌之易以是知天卽人也人卽天
也又曰當克商二年若不幸而不救周家之社稷宗廟
存亡未可知也周公安得而不苦切惟其苦切之至所
以能通乎神明其釋大誥也曰大抵國家無事中外乂
安未必非天所以稔其毒敵國外患侵陵擾攘未必非
天所以開其治若有患難有禍亂則志氣益強政治日
修乃天所以輔之也又曰今日禍亂之作天所以與我

成功之處其言之深切如此蓋宋南渡之時固無異於
今之時也然則讀是鈔者可以見先生之心亦可以觀
古今之變也已民國二十七年四月後學張壽鏞

御題袁燮絜齋家塾書鈔

議論持醇正興亡鑒古今致危惟戒逸勝怠莫如欽惜

未聯全璧幸仍揀碎金流斯失法度先已獲予心

袁燮解書

大禹謨儆戒無虞罔失法度節言人君豈能無安逸歡樂之時苟不至於過則亦不害其爲法度流而不返便是失法度云云余昔遊巡所至一覽卽過不肯因此稍稽庶政是以尹繼善有馳驛遊山之語余詩中每見此意今觀燮解與前指適相脗合余昔未見是書其言實先得我心耳

絜齋家塾書鈔卷一

宋鄧袁 燮和叔撰

虞書

昔在帝堯聰明文思光宅天下將遜于位讓于虞舜作堯典

堯有聰明文思之德所以光宅天下聰明不是尋常小小智慧此心虛明洞達無一毫人欲之私這是聰明今人舉事多不中理善言過于耳而不能領略至於君子小人之際不能別識皆不聰明之故惟其聰

明則所爲者無復有失所聽者罔非德言而人之情
僞亦不能逃焉今人聾者謂之不聰盲者謂之不明
何則謂其閉塞而不通也聖人此心之聰明固非止
於耳目之聰明然舉此亦可見惟其聰明所以發見
於外者粲然有文如威儀如言語以至於禮樂法度
皆是曰文不曰思而曰思去聲聖人難說思也思有悠
遠深沈之意只有文而無思不得有思而無文亦不
得也有此四德安得不光宅天下今以身體之吾一
身之輝光所及者能幾何居一家中未必能及一家

況一鄉乎未必能及一鄉況一國乎未必能及一國
況天下乎此無他只緣在我者未盡平日有許多過
失故其輝光不能及遠

堯典

曰若稽古帝堯曰放勳欽明文思安安允恭克讓光被
四表格于上下

若稽古不必言堯考古但史臣考之於古有如堯者
放勳者依倣前人之勳也有成功者謂之勳古人所
爲多矣吾擇其成績顯然昭著者倣之是爲放勳放

勲或以爲堯名非也堯舜禹當爲名何以言之曰格
汝舜曰格汝禹舜禹旣名則堯亦名也古人不諱名
孟子引放勲曰或者其號與欽明文思卽聰明文思
去聰字只說明字便見聰明本是一箇分析不得曰
欽者言其皆自敬中來也德雖至於聖人然臨深履
薄之念何嘗一日敢忘斯須不敬便有過失甚可畏
也安安者安而又安也謂之安其所當安卻無甚意
味仁者安仁或安而行之恭而安古人多說這安字
德盛仁熟終日周旋不出於規矩準繩之內而無一

毫辛苦勉強之意夫是之謂安一安字不足盡之故
又加一安字

克明俊德以親九族九族既睦平章百姓百姓昭明協
和萬邦黎民於變時雍

自欽明文思至格於上下此是治之大本自克明俊
德至黎民於變時雍此是治道之大體俊德只是我
之德俊有俊敏之意今人俊爽者謂之俊聖人固非
尋常所謂俊爽然其日進無疆處是俊欽明文思安
安允恭克讓這許多皆是克明俊德但作文之法欲

說下面事故須先說此句治道大體自身而及於家
自家而及於國自國而及於天下身不修不可以齊
家家不齊不可以治國國不治不可以平天下本末
先後之體秩然有序大學一篇可見矣又當子細看
克明字既睦字昭明字克者能也必實能明俊德方
可以親九族九族自高祖至玄孫是也如言妻二族
母三族似不然親九族裏面煞有事如立宗法辨昭
穆服紀燕飲之類其禮既備然後九族可親我夫親
九族必待九族一齊既睦了方能平章百姓百姓者

百官族姓也平當也章分明也德大者在上德小者在
在下賢者在位能者在職一一皆處置令平當分明
此是平章百姓昭明亦只是一箇分明須是百姓旣
昭明了方能協和萬邦黎民翕然大變矣

乃命羲和欽若昊天曆象日月星辰敬授人時

揚子雲曰羲近重和近黎羲和旣重黎之後爲司天
地之官分明以羲和爲天地之官以四子爲四時之
官朝廷大臣不出此六官此便是周之六卿自古如
此甘誓之戰乃召六卿在夏時已然可見也四子所

主者各一時凡屬於天者皆羲氏所掌凡屬於地者
皆和氏所掌也天下萬事何者非天地便如周家六
卿雖云各有所主要之天地官所屬者分外較大六
官無非是理會民設官分職以爲民極民之外復有
何事所以謂之敬授人時若人時不定何以使人趨
時赴功然欲敬授人時須先理會曆象曆以算數象
以參曆旣無差矣然後可以頒曆於天下所謂敬授
人時古人於此事甚重舜初卽位便在璿璣玉衡以
齊七政羲和涵淫胤侯至舉六師征之何故如此之